



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

**Neymar dak COVID-19
tashidak potetogo**

**Colombia tir asoshi tokteptsü teimla
alisang Miguel Uribe dak akha**

VOL. XXII ISSUE NO. 235 (ADOK 235)

DIMAPUR

TENTONÜ (MONDAY)

AAMI (JUNE) 09, 2025

₹ 5.00

US-i fungus miima bener arutsü merang

New Delhi, June 8, 2025 (Agencies): United States mekümdangra Covid den tamajungba tensa ka ajurutsü ta China nung US expert kati metetdaksüogo.

Chinese scientist anati US telungi toxic fungus bener aotsü merangba putetba sülen iba osang ashi.

Yunqing Jian (33) aser la tetong Zunyong Liu (34) nati 'Fusarium graminearum' ta ser fungus ka US telungi miimba bener aotsü tasa atong. 'Fusarium graminearum' ajanga wheat, barley, maize, aser rice nung "head blight" tashidak adokdaksür.

Iba fungus ya "potential agroterrorism weapon" ta züngoka lir aser kümshia dollar billion aika akoksadaksür ta US Justice Department-i ashi.

Iba tashidak ajanga meimchir aser shiruru saksüdaksür, temesen raksatsür aser tanur abenba nung timtem agütsür ta US Justice Department-isa ashi.

Yunqing aser Zunyong nati taoba mapang China nung fungus dak sendakba mapa inyaka liasü.

"Apuani nati inyakba ya US anema rara menaba ama lir. US-i China den tesentaktep pilatsüsa mapa kar meinyakra Covid den tamajungba tensa ajurutsü akok" ta Chinese affairs atema America top expert Gordon G Chang-i ashi.

Covid-19 wara adokdaksüba

novel coronavirus SARS-CoV-2 poktetba ya ashishitep aketba onük tulu ka lir. Mongin nisung kari coronavirus ya Chinese lab ka nungi adokdaksü ta temulung melemi bilemer.

"May 2019 nung China sorkari adokba People's Daily yimozülü nung nübortemi US anema raraba tenzükbä zülua liasü. Asenok America nunger anungji asen anemertemi ibala mesükba olulu jembir ta asenoki bilemer. Saka communist party ka atema iba ama olen ya kanga tongtipang lir. Parnoki Americanism anema jembiba yagi parnoki asen linük amaksü kuli yanglur. Apuani na ya Guantanamo-i yoktsüla" ta Chang-i ashi.

China-i asenok den rarar ta asüba mapang ka iba ya United States amakba lir. Xi Jinping-i teti raratsü indang jembir aser pai China loktiliba ajungai raratsü atema inyaker" ta paisa ashi.

"2020 nung state 50 nung alir America nunger ajaki China seeds angu. Iba ya US nung species kar adokdaksütsü atema inyakba asütsü. Ano taküm online Chinese retailer Timu-i America nunger dangi seeds yokogo" ta Chang-isa ashi.

"Iba ya anendaksütsü atema China den tesentaktep kecha mayutsüla. Covid ajanga mesüra fentanyl ajanga masü saka iba dang nungi tamajungba agi asenok dak kongshitsü" ta paisa shisem.

Nagaland Congress-i Rural Department aitsür

Dimapur, June 8, 2025 (TYO): Nagaland nung Rural Development department-i Mahatma Gandhi National Rural Employment Guarantee Act (MGNREGA) kübok beneficiary nem agütsüba sen nungi shilem balaka agiteta agiba aitsür ta Nagaland Pradesh Congress Committee (NPCC)-i metetdaksüogo.

Rural Development department-i iba tashiyim mapa inyakba aitsür aser bangdak Minister o state sorkari iba mapa inyakterem jangjatsü aser ozüing

tapet agi merenshitsü akhanger ta NPCC-i ashi.

"June 7, 2025 nü Kacharigaon Phevima Village Council-i iba dak sendakba osang yimjak nung metetdaksüogo. Iba inyakyim ya mapang talangka inyaka arur aser department ketdangsürtemi MGNREGA funds nungi shilem tulu agiteta agir" ta NPCC-i ashi.

"Department ketdangsürtemi tashiyim agi sen meshiba aser 'commissions' mesüra 'cuts' ta

ser sen agiteta agiba ya Nagaland ajungalen inyaker. State sorkari Nagaland nung ochimashi inyakba sobaliba nung iba ya shilem ka lir" ta NPCC-isa metetdaksü.

Nagaland nung yimdaklirtem atema temeten meshir kechiyong iba ozüing alema inyakyim ajanga parnok tangutsü tim mangur. Item senotsü ya yimdaklirtem asoshi nüngdakba infrastructure renlokba dang masü saka parnok nem social security agütsür, ta NPCC-isa ashi.

Assam nung 1950 ozüing amshitsü: CM Sarma

Guwahati, June 8, 2025 (Agencies): Assam-i ozüing alema arurtem jangjatsü aser meyipa yoktsü atema Foreigners Tribunals (FTs) nem telangzüba magütsütsü aser onoki Immigrants (Expulsion from Assam) Order kübok inyaksü ta Chief Minister Himanta Biswa Sarma-i ashi.

State sorkari 1950 ozüing benoktsü aser iba ajanga district commissioners-i expulsion orders agütsütsü tashi agüja lir, ta pai ashi.

Supreme Court-i Constitution Bench kübok Clause 6A ken o angadangdang Assam-i bendangertem maitsü jangjatsü

aser bendangertem meyipa yoktsü atema judiciary dangi teti aotsü nüngdak madoker ta shiogo, ta CM Sarma-i ashi.

"Immigrants Expulsion Order ta ser ozüing ka lir aser iba ajanga district ketdangsürtemi indangindanga inyaker. Onoki iba ya memetet liasü kechiyong lawyers-i iba indang mejembi, saka tangbo onoki iba ozüing kübok inyaksü" ta pai ashi.

"Ozüing alema arur aika akümer aser asenoki tang meinyakra teimba akümtsü. Tang nungi nisung ka bendanger ta putetba sülen aser iba ken o okadak benoka melira parnok meyipa yoktsü" ta CM Sarma-isa ashi.

NRC (National Register of Citizens) maparen ajanga state sorkari ozüing alema arurtem jangjatsü aser meyipa yoktsüba mapa shitak meinyaktet. Supreme Court-i tawa ashiba aser ano 1950 order anguba ajanga sorkari bendangertem anema mapa tekaraba inyaksü renemer, ta paisa ashi.

Assam nung tang Foreigners Tribunals 100 lapoka lir aser iba ya mezüing 2005 nung amenok. Assam Police kübok Border Wing ajanga Foreigners Tribunals ketdangsüa repranger aser Bangladeshi nunger ta temulung melemi bilemertem indang senso jangjashir.

Arambai Tenggol züngsem apuba sülen Manipur nung tensa kanga mejungi kümogo

Imphal, June 8, 2025 (Agencies): Central Bureau of Investigation (CBI)-i Meitei telok Arambai Tenggol züngsem Asem Kanan apuba sülen Manipur kübok valley district tem nung tensa mejungi küma lir.

Anti-Corruption Branch (ACB)-i Honibarnü Imphal airport nung Asem Kanan apu. 2023 kin o kin tsüngda mepetmesü adoka raraba nung pai shilem agi ta tai tonglokja lir.

Supreme Court-i tuyuba ama CBI-i iba dak sendakba ken o tem bushisüngdanga arur. Tensa majungba agi ken o kar Manipur nungi Guwahati-i belenogo ta ACB-i metetdaksü.

Honibarnü Imphal Kanan den Arambai Tenggol züngsem pezü apu ta police-i ashi. Ajisüaka, CBI sangdong nungbo parnoki Kanan apuba dang shia lir.

Iba atema Imphal yimti nung ozüing alema lungkak aitogo. Lungkak aitertermi lenmangtem mokdang aser sepaitemi parnok senshidaksütsü atema tear gas shells, mock bombs, aser live rounds amshitsüsa aküm.

Iba mapang arishi küm 13 tain tanur ka tetsüing nung yiru aser pa mozü ki nung anepaludar.

Honibar nikongdang nungi Deobar nikongdang tashi nung nisung 11 tashi yiruba osang angazüker.

Imphal kübok Palace Compound, Keishampat Bridge, Moirangkhom, aser Tiddim Road nung security akangshiogo. Sorkarisa valley district ajungalen internet shibangtsüogo.

Arambai Tenggol-i tatemzükbä kecha melii parnok volunteers chiokang ta takhangba agüja anogo 10 nü statewide shutdown ayongzükogo.

Külen, Imphal East kübok Khurai nungi tetsür telok kati amokmeren osang ka sangoktsüogo.

"Tangalen aliba MLA ajak Imphal-i arutsüla aser June 10 nikongdang 6:00 ako tashi nung popular government akümtsüla" ta tetsürtemi ashi.

Mapang züngzüktsüba tashi nung Imphal-i maruba MLA tanaben state telungi maitdaksütsü ta tetsür telokisa

metetdaksüogo.

Deobar nikongdang 5.30 ako tashi nung valley districts nung tensa kanga mejungi lir.

Rajya Sabha MP Leishemba Sanajaoba den MLA 25-i Deobarnü Governor Ajay Kumar Bhalla den ajurutep aser state nung law & order tensa lemsatepogo.

BJP, NPP, aser Congress nungi MLA temi Governor dang Arambai Tenggol züngsemtem tatemzükbä kecha melii chioktsü atema inyaksü ayongzük ta osang angazüker.

"Tanü MLA telok kati Raj Bhavan nung Manipur Governor Ajay Kumar Bhalla den ajurutep. Idangji MLA temi Governor dang tensa osang lemsatep aser ajaki haihaura akaba lemtet ka agitsüsa inyaksü mepishi" ta Raj Bhavan sangdong ka nung ashi.

Governor-i teshimtet telok dang tensa süngjemtsü atema nüngdakba mapa ajak inyakdar ta ashi.

"Arambai Tenggol army chief Asem Kanan ya nija ken o ka atema CBI-i apu. Tanüingba AT

züngsem pezüji state police-i apu kechiyong parnok Kanan apudang liasü" ta BJP MLA & spokesperson L. Ibomcha-i ashi.

"Governor-i Arambai Tenggol anema meinyaker ta shiogo aser tawa tzümetsüing timtem ajurudang AT-i sorkar den yaritepba atema pelaba metetdaksüogo. AT züngsem pezüji chioktsü" ta Ibomcha-isa ashi.

"Arambai Tenggol züngsem pungu apuba ajanga state nung tensa mejungi kümogo. Curfews benokogo, internet services shibanga lir aser tesem aika nung lenmangtem noktanga lir" ta Congress MLA Okram Surjakumar-ia ashi.

"Sorkari nisung kar aputsü lira public nem kuli agütsütsüla aser tashishitsü melii inyaksüla. State nung yimjung bener arutsü atema asenok longjema alitsüla aser temulung agütsütsüla" ta pai ashi.

AT züngsem pungu apuba nungi ka dang CBI ken o den sendaktepa lir. Tanüingba nisung pezüji local police-i preliminary background checks südar aser

ozüing alema inyakba den tesentaktep kecha melira chioktsü ta Governor aser security advisor nati shiogo ta Congress MLA Surjakumar-isa ashi.

Deobarnü Governor Bhalla-isa Raj Bhavan nung high-level security review meeting ka ayonga menogo.

"Governor Ajay Kumar Bhalla-i high-level security review meeting ka ayonga menogo. Security Advisor, DGP, ADGP (Law & Order), IGAR (South), IG CRPF, aser tanga tongti ketdangsürtem iba senden nung denogo" ta Raj Bhavan sangdong ka nung ashi.

Congress general secretary Jairam Ramesh-ia Manipur nung tensa mesüngjemba atema tebilemtsü tulu abenba metetdaksüogo.

"Manipur nung tesüiba ghonda 24 tsüngda Imphal West, Imphal East, Thoubal, Kakching, aser Bishnupur district tem nung nübortem timtemer aser mepelateper" ta Ramesh-i metetdaksü.

Wokha nung shiti ajanga timtem agütsüba tebilemtsü lemsatep



Wokha nung June 6, 2025 nü Consultative Meeting on Human Elephant Conflict Mitigation alidang Minister, Environment, Forests and Climate Change, C L John-i jembiba noksa nung angur.

Dimapur, Aami/June 08 (TYO): Nisung aser shiti tem tsüngta mepetmesü adokba ajemdaktsütsü nükjidong nung shisadokden senden ka January 6, 2025 nü Wokha nung mena liasü. Iba senden nung sorkar ketdangsür, libajen tsütsü mongintem aser nüburtem nungi teshimtet nisungtem adenshia region nung nisung aser shiti tsüngta mepetmesü tali akumba bentettsü asoshi tasa balala jembia liasü.

Sentong akhumdong ka ama Minister, Environment, Forest, and Climate Change, C. L. John aden aser pai tzü-mopung melenshiba ajanga arem shiruru yimya melenshiba aser parnok aliba tesem samaa aoba indang jembia liasü.

Nisung aser shiti raraba ajanga alu aser ki o jen raksaba aser nisung asüba lir, ta pai ashi.

Minister-i forest guard training tashi itshitsü nügdaker ta ashi aser sanctioned posts tesadang ka dak tema tazüing lir, anungji tongtipang tesemtem mayimjemi yutsür, ta ashi.

Pai Bhandari nung forest personnel tali yoksemtsü ta ashi aser shiti tem tesem melenshia belentsü tamakoktsü, anungji nütsüng aziükba mera amala rebrangtsü, ta shia liasü.

Iba senden nung Advisor, Department of Agriculture, Mhathung Yanthan; MLA Y. M. Humtsoe, MLA & Chairman SDPDB Bhandari, Achumbemo Kikon, aser Advisor to the Chief Minister, Dr. Chumben Murry nungertem dena liasü.

Human-elephant conflicts ajemdaktsütsü asoshi tim department temi maneni meranga inuakba Advisor Mhathung Yanthan-i ashi.

Timtem ajurur alir nem

tekeraba nung compensation agütsütsü nügdaker, nüburtemi anir arem wazüka ayuba mapa inyaksüla aser awareness campaigns ayongzüksüla, early warning systems amshitsüla aser shiti ajanga teraksa agütsüba ajemdaktsütsü asoshi sentong balala ayongzüksüla, ta pai ashi.

MLA Y. M. Humtsoe-i shiti tem yimya tajungba nung angatettsü merangtsü ayongzüka liasü.

Advisor, Dr. Chumben Murry-i nisung meimchir aser shiti nütsüng ulua akumba indang jembia aser nisung aser shiti tali anasatapa aliba ajanga mepetmesü tali akumer, ta ashi.

Item timtem majurutsü asoshi artificial intelligence densema technology balala amshinung ajungtsü, ta pai ashi.

Sentong nung MLA, Achumbemo Kikon-i jembidang, libajen junga ketdang asütsü aser shiti aliba tesem wazüka ayutsü tongtipang ta ashi aser ketdangsür dang nisung aliba tesem aser shiti tem kumzüka ayutsü asoshi solution tajung amshitsü ayongzüka liasü.

Deputy Commissioner, Wokha, Vineet Kumar-i jembidang sorkari item mepetmesü bentettsü merangba, tatalokba osangtem rebrangshiba, compensation mechanisms aser shiti temi timtem agütsüba tajungba nung aziüktsü asoshi technology amshiba indang jembia liasü.

Wildlife expert Dr. Rudraditya-i shiti yimya balala indang scientific tsütsü nungi lemsatapa liasü.

Zuthunglo Patton, IFS, CF (STC) Nagaland ajanga Forest and Biodiversity Management (KfW) Project indang

jembidang, iba project nung Unified Mitigation Framework Initiative kübok Kohima, Peren, Wokha, Tuensang aser Mokokchung district tem nungi yimtsüng 135 dena lir, ta ashi.

Sentong nung Research Associate WII, Rishi Basumatary ajanga mepetmesü ajemtsüba yimyattem tejangja rasaa shia liasü.

Iba sülen timtem ajurua aliba yimtsüng aser nüburtem nungia parnoki ajangshibattem, shiti arua parnok aliba tesem nung timtem agütsüba lemsatep aser sorkar dang lenmang bushitsü ajungshia liasü.

Sentong tenzüka jembidang, 2018 küm nungi tang tashinung shiti 15 aser nisung pongu takum samaogo, ta Vedpal Singh, IFS, PCCF, and Chief Wildlife Warden, Nagaland ajanga metetdaksü.

Nagaland nung shiti 440 shi lir aser item ya tesadang jungnüa Wokha district nung alir ta pai ashi.

Tesüiba century nung shiti nütsüng kanga ajema akumba aser nisung meimchir tali akumba ajanga pei alitsü tesem agi rakteptsüsa akumer, ta pai ashi.

Senden nung Dharmendra Prakash, IFS, PCCF and Head of Forest Force, Nagaland menden liasü, Suman W. M. Sivachar, IFS, DFO Wokha and Doyang ajanga pela agizükba o jembia aser sentong tembanga Mhonbemo E. Patton, IA & AS, Principal Secretary to the Government of Nagaland, Department of Environment, Forest, and Climate Change and Director General ATI, Nagaland ajanga jembia aser Tokaho Kinimi, IFS, Wildlife Warden, Dimapur Wildlife Division ajanga melepzüng o jembia liasü.

NSCN/GPRN ajanga züngsem ka mapa nungi anisüngzüc agütsü

Dimapur, Aami/June 08 (TYO): NSCN/GPRN ajanga pei jurila kuli tem mechi Sectional Officer, Khetoka H. ya June 5, 2025 nü linük tenzüka mapa nungi anisüngzüc agütsüogo, ta MIP, NSCN/GPRN sangdong ka ajanga ashi.

Cabinet Secretary ajanga meyongnem agütsür aliba totuyuba Central Secretariat nungi agütsüba nung pa tarutsü jenjang tajung moaja liasü aser Naga yimten asoshi pai inyakba teti bilemtettsü aser Naga nungi puti otsü nung alitsü, ta ashi.

Zunheboto DLSA ajanga awareness campaign ayongzüc



Dimapur, Aami/June 08 (TYO): Nagaland Legal Services Authority kübok Zunheboto District Legal Services Authority ajanga Department of Legal Metrology & Consumer Protection, Zunheboto den lungjemer EAC Office, Hoshepu nung June 7, 2025 nü Consumer Protection Act 2019 indang awareness campaign ka ayongzüka liasü.

Iba sentong nung Retain Lawyer, ZDLSA, Easter H Yephthomi-i Consumer Protection Act 2019 indang rateta ashi aser Assistant

Controller, LMCP Zunheboto Khevishe Z Zhimomi-i Legal Metrology Act & Nagaland LM enforcement Rules indang jembia liasü.

District & Session Judge & Chairman ZDLSA Phuleto Yephtho, NJS ajanga iba sentong ayongzüka nükjidong rateta ashi aser Chairman, Hoshepu Area Public Organisation, K. Khushito Awomi (Rtd.), AIG Prison ajanga o tatsüka jembia liasü.

Iba awareness campaign nung putu menden, GBs, HRPO ketdangpurtem aser arogo nungi lenirtem dena liasü.

Assam Rifles-i state nung yoga sentong ayongzüc



Dimapur, Aami/June 08 (TYO): Assam Rifles temi aruya aliba 11th International Day of Yoga nüngtem nung June 7, 2025 nü Government Higher Secondary School, Sechu-

Iba sentong nung kaketshir 90 arua tejangraba tulu nung shilem agia liasü, aser parnoki noksa yangluba ajanga yoga nungi tajangzüc anguba lemsatapa liasü.

Sentong nung shilem ka ama yoga indang special lecture agütsü aser iba mapang anogoshi takum nung yoga nungdakba, temag, tekolok shisatsü aser mulungsentsü ajangzüka indang lemsatep.

Temang anema alitsü atema anogoshi yimya den yoga amshitsü lanurtem nem angazükdaksütsü nükjidong nung

iba sentong ya ayongzüka liasü. Drawing competition nung takok angur nem sempet agüja sentong temang.

Maneni Assam Rifles temi "Healthy Mind Resides in a Healthy Body" omen nung ajemdaker lanurtem asoshi yoga sentong ka ayongzüka liasü.

Iba sentong nung Doyapur aser anasa aliba yimtsüngtem nungi lanur aser tanurtem arua shilem agia tekolok anema alitsü aser temungjang nung tesunep alitsü indang angazükdaksü.

Temang aser tekolok anema ayutsü tongtipang ta angatetdaksütsü aser yoga ajanga tajangzüc anguba indang awareness agütsütsü asoshi iba sentong ya ayongzüc.

Lanurtemi pelashishia iba sentong nung shilem agi aser Assam Rifles temi maneni yaritepba asoshia pelaba lemsatapa liasü.

Assam Rifles-i Avangkhu yimtsüng nung solar lights agütsü



Dimapur, Aami/June 08 (TYO): Assam Rifles temi Sunbird Trust den lungjemer June 3, 2025 nü Rungakusu Colony nem solar lights ter aser Avangkhu Village nem toku agüja liasü.

Ibai nüburtemi lenmang

sangwadaktsütsü mepishiba nung ajemdaker inyaka liasü. Sentong nung Village Chiefs, Village Councils züngsemtem aser Mothers' Association nungi densena nisung 75 shi dena liasü.

Nüburtemi anogoshi

nüngdaka aliba Assam Rifles temi perija mapa tajung inyakba asoshi sentong nung adener temi pelaba lemsatapa liasü.

Iba yagi nüburtemi amshiba tesem sangwatsüba kisüng masü saka renewable energy indang tali angatettsü.



June 08, 2025 nü Brasilia, Brazil nung 11buba BRICS Parliamentary Forum senden nung Lok Sabha Speaker, Om Birla aser Rajya Sabha Deputy Chairman Harivansh Narayan Singh na den BRICS züngsem linüktem nungi lenirtem tangokba noksa nung angur.

Jaishankar-i France, Belgium aser EU nung lenirtem ajurutsü

New Delhi, Aami/June 08 (Agencies): Amongnü External Affairs Minister, S Jaishankar-i Europe semdanga New Delhi nungi apusoa ogo; Europe nung pai France, Belgium aser European Union nung lenirtem ajurua senden amentsü.

Europe nung lenirtem den pai Pakistan linüki kiralongra pusemba aser India-i kiralongra anema raraba indanga lemsateptsüa akok.

Jaishankar-i France tama semdangtsü.

Ministry of External Affairs (MEA)-i sangdong ka ajanga, "External affairs minister-i Paris aser Marseille semdangtsü aser yangji pai Minister for Europe & Foreign Affairs, Jean Noel Barrot ajurua senden amentsü," ta metetdaksü.

Jaishankar-isa Marseille nung ayongzükba Mediterranean Raisina Dialogue senden nunga shilem agia adentsü, ta MEA-i metetdaksü.

Brussels nung Jaishankar-i EU High Representative & Vice President Kaja Kallas den India aser European Union na tsüngda tesendaktep tajungba akümtsü atema jembitsü.

"Tesüiba küm ishika tsüngda India-European Union strategic partnership ya sector aika nung kanga tashi itta kümogo. Talisa taküm February ita nung EU College of Commissioners-i tang mezüng India semdangba ajanga ano jenjang tajungba kümogo," ta MEA-i metetdaksü.

Jaishankar-isa European Commission nung tongti

ketdangsertem aser European Parliament nungi züngsemtem ajurutsü.

Tesüsa pai Belgium semdanga yangji lenirtem ajurutsü.

"India aser Belgium na tesendaktep kanga junga lir aser rongsenkettzüng tsütsü tesendaktep kanga junga lir. Tanübo linük ana tsüngda shishilembaba aser investment, green energy, technology, pharmaceutical, diamond sector aser nüburtem tesendaktep kanga junga kümogo," ta MEA-i metetdaksü.

Jaishankar-i Belgium Deputy Prime Minister aser Foreign Minister Maxime Prevot-a ajurutsü aser Belgium nung aliba India nungertem-a ajurutsü.

West Bengal aser Tamil Nadu nung BJP sorkar arutsü: Amit Shah

New Delhi, June 08 (Agencies): Amongnü Union Home Minister Amit Shah-i Tamil Nadu Chief Minister, MK Stalin-i aniba DMK party aija, tesüiba küm pezü tsüngda DMK-i ochimashi jenti inyakogo, ta metetdaksü.

Madurai nung lokti senden ka nung jembidang Shah-i, 2026 küm BJP-i West Bengal aser Tamil Nadu nung sorkar tentetsü, ta metetdaksü.

"Tamil Nadu nung DMK sorkari ochimashi jenti inyakogo. Central sorkari sen crore 450 jenjang nutrition kits agütsü, saka state sorkari ibaji private company ka nem agütsüba ajanga sensakertem

chiyungtsü agi anünger," ta pai ashi.

Dravida Munnetra Kazhagam (DMK) sorkarisa lisem ayaba dak sendakba nung sen crore 4600 shi jenjang ochimashi inyakogo, aser ibaji ajanga sensakertemi jenjang tasak agi lisem alitsüsa akümer, saka state sorkarbo sen aazüker, ta pai aitsü.

"MK Stalin-i aniba sorkari inyakba ochimashi jenti ni meteta lir, ajisüaka item ajakji zünga shia mapang meindokner," ta pai ashi.

BJP-i Odisha, Haryana, Maharashtra aser Delhi elections nung takok anguba dak sendakba nung Amit Shah-

i taruba küm Tamil Nadu aser West Bengal nunga party-i takok ngua sorkar tentetsü, ta metetdaksü.

"Sangküm BJP-i aniba NDA teloktepi takok angutsü aser AIADMK-i Tamil Nadu nung sorkar tentetsü. Nüburtem tebilemba ni angateter aser taruba election nung Tamil Nadu nung alirtemi DMK sorkar atsüngdoktsü," ta pai metetdaksü.

Stalin-i aniba sorkari election mapang nangzükba shilem 60 meinyak, ta shia Shah-i, "Stalin, ni nü dang taoba election nung nenoki manifesto nung nangzükba kwi inyaka lir, ibaji ashitsü ni jazüker," ta metetdaksü.



Tawa Bengaluru nung aliba Chinnaswamy stadium anasa nisung 11 ajemsetba tatalokba anema June 08, 2025 nü Bengaluru nung Karnataka Assembly nung opposition lenir R. Ashoka, BJP MLA tem aser MLC züngsemtemi Chief Minister Siddaramaiah aser Deputy Chief Minister D.K. Shivakumar na anema longkak aitba noksa nung angur.

West Bengal kübok district tenet nung security akangshiogo

New Delhi, June 08 (Agencies): Centre aser state agencies napronglai West Bengal kübok district tenet nung security aser intelligence networks akangshitsü atema maparen tenzükogo, ta ketdangsertem osang ka ajanga metetdaksü.

Bangladesh nung amenoka aliba fundamentalist group Jamaat-ul-Mujahideen Bangladesh (JMB)-i West Bengal kübok district tenet nung modules (network) amenoktsü tebilemba lir, ta intelligence osang ajanga metetba sülen security akhangshir.

Tawa JMB züngsem asem apuba sülen parnok dang asüngdangyaba ajanga item osang kar jangjaa liasü. Taoba ita Birbhum nung Aazmal Hossain aser Saheb Ali Khan na apu aser South 24 Parganas district nungi Abasuddin Molla apu.

Iba dak alia Central aser state intelligence agencies nungi ketdangsertemia item osang kar lazüka liasü.

Mezüngbuba shilem nung Bangladeshi fundamentalist group-i Malda, Murshidabad

asert North Dinajpur district tem nung module amenoktsü tebilemba liasü aser takok ngua inyakba sülen tanüngba district pezü- North 24 Parganas, South 24 Parganas, Nadia aser Birbhum nung module amenoktsü tebilemba liasü.

North Dinajpur aser Malda district na ya northern sector nung lir aser tanüngba district ponguji southern sector nung lir. Birbhum dak alaka tanüngba district trokjibo Bangladesh den International Border nung lir.

Birbhum nungbo International border mali saka iba district ya South Bengal aser North Bengal na tsüngda tesendaktep lenmang ka lir.

Modules amenoktsü atema mezüng parnoki lanurtem mesüzüksü aser parnok sleeper cells nung züngoktsü sentong liasü.

JMB züngsem asem jagi lanurtem karbo mesüzüksü meranga liasü, aser police-i item lanurtem nungjagi osang karbo ngutetogo.

Pua aliba JMB züngsemtem rongnung Abasuddin Molla bo Pakistan den tesendaktep lir. Tan ita tetenzüklen West Bengal police-i pa pua liasü.



June 08, 2025 nü Panaji nung Goa Health Minister Vishwajit Rane-i Goa Medical College & Hospital semdangba mapang pai doctor ka den jembidang tangokba noksa nung angur.

Küm 11 tsüngda PM-i osangbenertem senden kata mayongzük: Congress

New Delhi, June 08 (Agencies): Amongnü Congress lenir Pawan Khera-i Ato kilonser Narendra Modi aija, pa kümsük tatembanglen kati arudar, ta metetdaksü.

Khera-i X ajanga, "Küm 11 jungogo saka osangbenertem senden kata mayongzük. Pa kümsük tatembangleni arudar. Pa politics ji alima matsüngdang jungkai adokogo. Pa yimsüsüba jenjang raksadar. Pai benokba mapatongtem meyipa arur. Ato kilonser ya asaya-menü ka," ta ashi.

Anogo ka jakdang Congress party-i, Modi sorkari alima sabang nung Pakistan sendokdaksütsü merangba maparen nung tamakok nguogo, ta aija liasü.

Khera-i, iba ya India nunger sepaitem aser nüburtem ozüng alema ashiooktsüba lir, ta ashi.

"Kiralongrartemi Pahalgam amakba sülen Pakistan anema sashia inyaktsü aser alima nem

Pakistan sendokdaksütsü, ta onoki imlaa liasü, ajisüaka kechi atalok?" ta Khera-i ashi.

"China-i Pakistan nem 40 fifth-generation stealth J-35A fighter jets den PL-17 missiles agütsür. Azerbaijan-i Pakistan nunger JF-17 fighter jets 40 alizüksü atema dollar sen billion 2 invest asür," ta Khera-i metetdaksü.

"World Bank-i Pakistan terenlok atema dollar sen billion 40 agütsütsü lemtetogo. IMF-i Pakistan-i mepishiba ama dollar sen billion 1 agütsütsü lemtetogo. Karachi yimti nung steel plant ka tanaben amenoktsü atema Russia-i dollar sen billion 2.6 indang tezüngzüktepa ka agiogo," ta paisa metetdaksü.

Khera-i, amakba sülen anogo ishika tsüngda Pakistan ya UN Security Council indang Anti-Terrorism Committee nung Vice Chair shimogo, aser iba ya ketdangsertem jenjang nung asalentong tsütsü tamakok tuluka lir, ta metetdaksü.



TIR YIMYIM YIMOBILEM (EDITORIAL)

DIMAPUR MONDAY, MAY (AAMI) 09, 2025

Mapa inyaktertem sen

Center government nungi Mahatma Gandhi National Rural Employment Guarantee Act (MGNREGA) sentong ajanga yimtsüng shia nung yimtaklir shinga mapa teinyaktsü makaba agi timtem majurudaktsütsü nükjidong nung, küm nung kibong shia anogo noklangka ayangtsü asoshi mapa agütsür. Atangji, yimtak süaka takartemibo yimtaklir sensakertem timatembaji memetettsüa akok mesüra metetyonga temeim maliba purtemibo sensakertem mapaa maka aser chiyongtsüa maka ta timatembaji süoki ia mebilemtsüa akok. Ajisüaka, kodang asenoki sensaker kibong nung tanurtem nüngdak peritsütsüabajibo yutsür chiyongtsüa maka aser yimra agi atong nunga mozü süngjang kata alia mechitetba timtem tiaji ngudir, asenokia asenokang machii aser magii parnok nemji agütsünütsü. Tsüngremia asenok makamait aser timtem ngua yamaji meima yarir aser kasaji alima nung takar aser tulurtemi sensaker aser timtemer yaridaktsüner. Aji oda, takartemi pei akabaji sensaker yaritsü asoshi kadaktsü ta aser tulurtemia pei tulur menden nung amenbaji tilartem yaritsü asoshi mendaktsü ta angateta inyakra, alimaji kotak ama asütsü. Ajisüaka, tanü asen Naga lima nung balaka, takar aser tulurtemi sensaker aser tilar yaritsü bilemer masü saka sensaker aser tilar asoshi lemozütsüba shilem dena rakzüka aginer. Iba jagi Nagaland nung nisung ishika kanga takar aser tulur saka tanüngabajibo mapaa maka aser chiyongtsüa maka ta asüba tia nung timtemba purtem lir. Iba ama tia ka nung yakanü Kacharigoan (Phevima) Village Council-i Nagaland Rural Development Department-i par yimer Village Development Board (VDB) dang MGNREGA sentong ajanga yimtaklirtem kibong shia küm nung anogo 100 ayangba sen yokba nungi noklang nung shilem 30 aser ano mapa inyaktsü asoshi hadir alitsü atema yokba sen nungibo noklang nung shilem 50 meyipa meshir saka magütsütsü lemtetogo ta osangbenertem ajanga yimjak nung metetdaktsüba jagi, Nagaland RD department nung temelenshi tajung ka adoktsü imlar. MGNREGA ajanga yimtaklirtem nem kibong shia anogo 100 mapa inyaktsü agütsüba taaji anogo nung sen Rs.234 adoker aser iba senji akhidang amato department senpongi aoer masü saka yimtaklir mapa inyaker bank account nung dang senji shitak yoker, anungji department nung alir mapa bolutsüa mali, aser tai menadaka mali. Ajisüaka, yimtak mapa inyaktertem shia bank account-i parnok mapa inyakba taa yokba sen nungi shilem ka meyipa meshi nungbo, ajibo tim masü. Tangbo mapa inyakba sen nungi 30% aser hadir aliba nungi 50 % meshir ta Phevima yimteni aitsüogo saka pei meyong sen nungi kari danga 1% meshira, ajia tai asütsü. Aji oda, sen ishika mesüra aika meshir ta masü saka memeshitsüla meshir, anungji ajibo melenshitsüla. Atangji, Phevima yimten aser Village Development Board-i par yimer MGNREGA sentong nung mapa inyaker agizükba sen nungi RD department nung inyaker tulurtemi shilem tuluka meyipa meshir ta asübaji osang tasen kabo masü kechiyong iba kasa osang ya telong nungbo yimtsüng shia nemnemba ola angashir saka shingaia Phevima nunger amaji teti ajungtsü bilema nüngsen magiteter aser takoksa ajurutsü tsübur, kechiyong RD departement nung inyaktertemi meshitak inyakba anemra, meyiper RD department purtemi yimtaklirtem akoksadaktsütsü tsübur. Ajisüaka, koba nung südirsüaka meshitak inyakba anema ola adoktsü tsübura aser meshitak inyakba anema inyaktsü nüngsen magitetra, oda odabo iba lima, iba lokti aser iba yimtakji meshitak inyakyim aser sobalibatamang shitak akümtsü aser shitakjiang meshitak akümtsü. Tanü Nagaland nung mapa inyakyim aika yamaji kümogo. Aji oda, mapa meshitak inyakba nungang tajangzük tulu angur, anungji aji shitak saka mapa shitak inyak nungbo tagitsü teraka dang alir, anungji aji meshitak ta asüba limaji Nagaland kümogo. Kasaji, ashiko, tang Phevima yimteni inyakbajiang meshitak aser tanüngba yimtsüngtem nung ola madoki MGNREGA sen amshibajiang shitak akümtsü akok ! Iba amajika atalokra, Nagaland nüji akümtsüba len talangbai mekünner asütsü.

OLEMSABANG

Aotsür Aor tangari akümtsübuttsüsa alitsüla

~ L. Kika Pongener

Asen Ao kinji Naga nunger rongnung lenla ajak nung mezüngbur ta tangar kin ajaki aküm agütsür aser tushia jembir. Asen Aori ayongzükba mongdang-mongchi, benjong-bentsü aser lokti-senden balala nung tongti-tejaokertem ajaki asen Ao kin nem iba konang narokümüji agüja jembir. Aji oda, asenok nem tangari aküm agüja tushia jembiba amaji asenoki mapa agi liteta sayutsü kanga tongtipang lir. Kechiyong tangari aküm agüja tushia jembiba nungji konang-nungsang dang masü, khuret dena lir ta asenoki angatettsüla. Lenla ajak nung mezüngbur ta asübaji khen kanga junga shisadangra, asenokji tangar dang nungi terabo temaba, tambusang, tekolakba, lennir, tesayur aser tangar dang terabo tashitemetetba ta ajarba sudi. Anungji asenok iba konangnangsang, tenung tajung, narokümüji dang agir temulong sua alitsüba masü, saka asenok khuret tulu lir ta angatettsüla, aser asenok libaliru yimya ajak nung tangari akümtsübuttsüsa alitsü kangasa tongtipang lir. Tangari asen Ao kin dak nungi tajung yimlar...Surabangla, asenok dak nungi tangari yimlaba amaji tajung adoktsüla aser asenok mapaji tajung asütsüla.

Tanü putu ya kinuk-kisang ka nung tang kechi ataloker, item ajakji minute-second tsüngda nung aser tenuk masepshi nung Social Media sabang ajanga alima ajunga sunga-adoker. Küm ka-ana shi sua ogo, asen Aor kibong ka nung kidang yariteper (Domestic Helper) kilir ayuba dak kanga mejungi züka merenshiba otsü/osang ka Social Media sabang nung alima sunga prokshiba asenok aikati ngur alitsü sudi. Aji oda, iba tatalokba otsü/osang-to ano mamai aliba mapang ka nung, ano tawa asen Aor-sa kibong ka kidang yariteper (Domestic Helper) kilir ayuba ka dak tali-tapong züka merenshiba otsü/osang ka Social Media sabang nung alima sunga prokshiba asenok aikati ngur alitsü sudi. Kidang ki mapa nung yariteptsü kilir ayubaji mashi nisung ka kidangpo mayur, terabosa tangar jakla meteter, terabosa shia-meteter nisung kidang dang ayur. Asen kidang kilir ayubaji pei jala-jabaso amai meima anepalua, sayua nisung tajung kümdaktsütsü atema ayur. Anungji nisung tajung kümdaktsütsü atema arrtsüa merenshitsübaji tim dang, saka yimya dak tali-tapong alima nuburi tetla-tetshitsüsa memerenshitsüla.

Küm ishika sua ogo, asen Aor kibong tajung ka kidang Arunachal nunger asangur chanu ka school züngdaktsütsü aser ki mapa nung yaritepa lidaktsüba....Saheb-ba jagi asangubaji anepdang/aonung shia yi Dokan-i Yi alitsü yokba aser Mim-Saheb laia anogo shia Pan Dokan-i Pan alitsü yokba otsü ka lir. Aser iba asangubaji sodi mapang par tsürabur dangi aodang, par tsürabur aser par yimer dang Aor ya asenoki jembiba/yimlaba ama-to masü asenok den libaliru kecha tepila malia ta ashiba otsü ka angazük....Ashiko, parnok-ibo asen Aor-ji Yisu den küsa, mesura kodak tenyar amai alitsü ama bilemogo sudi....Saka asenok libaliru yimya angudang kanga aoksar aser sungmanger alitsü sudi....!!! Ano asen Aor kibong tajung ka, mission mapa sen lakh junga endoka inyakba kibong ka, saka par kidang alir kilirbo shiruru jenjang nung ayuba otsü ka lir....Par kidang kilir nem chiyungtsü agütsübaji Azü-Ak nem agütsüba chiyungtsü den kecha tepila mali....Chisung-aonsung tanüngzük dang agütsüba otsü lir....Alima talang nung mission mapa tulu inyaker, saka kidang kilir dangpo meima mebenshir. Ashiko, iba kilirsang jagi komaka bilema alitsü (?) Mesura par lima nung oagi iba otsüji par tsürabur aser par yimer dang komaka jembia alitsü (?) Asen kidang kilir dang meima benshibaji mission mapa tulutiba masü no...???

Aotsür Aor tashitemeteterem, tulurtem, takartem, missionary-tem, Tsüngrem tenzükertem....Tangar kintemi asenok dak nungi tajung yimlar....Surabangla, tangari yimlaba ama asenoki litetdar ma (?) Mapang ka nung aseni sayua anitetba anutoklen alir kin kar/nisung kari iba amai asüngdangba otsü ka angazük....Yisu Khrista ya Aor-a na??? ta asüngdangba otsü lir. Aji oda, tangar kintemi asen Aor-ji iba jenjang nungji yua lir. Surabangla, parnok dangji asenoki kechi lesson sayur...??? Asenok tambu-su agi azü-azüa alitsü kanga tongtipang lir. Asen adianu anutoklen aliba kintem dang asen Ao kini Yisu yimsu osangtajung sayua nuchi kümdaktsü. Yongji, asenok ama tajung kümdaktsünuyong parnok jala-jabaso asenok kidang kilia lidaktsütsü asoshi temuong lemteta yutsür....Anungji asenoki parnokji meima, anepalua, sayua tajung kümdaktsütsüla. Atangji, asen Aotsür Aor khen meyipa reprangshitsü mapang kati menepogo....Aji oda, mesura asenok tangari tetala-tetshiba kin ka akümtsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Egypt nem Khristan monastery ka agütsüba atema Khristan tem jashir



Sinai tenemtsüng nung aliba Saint Catherine's Monastery noksa nung angur.

June 08, 2025: Tawa Egypt nung court kati alima nung Khristan monastery tejentiba rongnung ka Egypt sorkar nem agütsüba sülen alima nung Khristan lenirtemi ibaji anema ola adoka sorkartem dang tiyongtsüi ia inyaksü mepishir.

Tan hopta Greek Foreign Minister George Gerapetritis-i Cairo yimti nung Egypt Foreign Minister, Badr Abdelatty ajurua court kati sorkar nem Saint Catherine Monastery agütsüba atema tebilemtsü akaba lemsatepogo.

Sinai tenemtsüng nung aliba Greek Orthodox monastery ji shibangtsüa akok aser museum küma yanglutsüa akok, ta Khristan temi bilemer.

Tesüiba Aso (century) aika Orthodox putirtem iba monastery nungji liasü.

Sinai tenem ya Yihuda nungertem, Khristan tem aser Islam yimsü amangertem ajak atema kanga temeshi tesem ka lir. Iba tenem nung Tsüngremi Mosa den jembi aser Mosa-i ozüng 10 agizüka liasü ta amanger.

Iba tesem ya Khristan theology aser temeshi aini aoertem atema kanga tongtibang lir aser iba monastery ya alima nung monastery tejentibatem rongnung ka lir.

Osangbener den jembidang Greek Foreign Minister, Gerapetritis-i, Iba monastery temeden wazüka ayutsü atema tekeraba nung inyaksü asoshi künati bangjemogo, ta metetdaksü.

"Egypt aser Greece napronglai akhidang nungi aliba kiojen ya wazüka ayutsü aser iba temeden Greek Orthodox nem agütsütsü atema jembiogo," ta pai ashi.

Taoba hopta Egypt Tir, Abdel Fattah el-Sisi office sangdong ajanga, Egypt-i Saint Catherine's Monastery ji wazüka ayutsü, ta metetdaksü.

Ajisüaika court obendang ajanga item telemtetbaji agientsütsüa akok, ta tebilemtsü akar.

Court-i, "548 nungi 565 küm tashi nung Byzantine tamarener Justinian I-i amenokba Saint Catherine's Monastery ali aser UNESCO World Heritage Site ji Egypt linük meyong asütsü," ta obendang agüja liasü.

Egypt Tiri yimjak nung monastery ji yimsü dak sendakba tesem ama wazüka ayutsü, ta nangzükogo, ajisüaika Khristan lenirtemi court obendangji ashishir.

Athens & All Greece nung Archbishop Ierenemos II-ia court tetuyubaji aitsüogo.

Archbishop-i sangdong ka ajanga, "Yashi tashishitsü obendang agütsüogo aser iba ya meimchir temeden anema inyakba lir. Tailisa Egypt judiciary-i yimsü temeden anema inyakba lir. Alima nung Orthodox Khristan kiojen tejentiba- Monastery of Mount Sinai ya amokmeren tia ka nung ajemokogo," ta metetdaksü.

Paisa Greek sorkar dang tangsa tiyongtsü ia inyaksü mepishi.

Iba monastery nung aliba kaketnang nung akhidang Khristan tem tezüluba balala aser Byzantine mapang yimsü dak sendakba mosaics aser nüngshi osettem aika lir.

Egypt sorkari iba monastery jagi museum küma yanglura

ibaji ajanga Khristan monastery tetezü samatsü, ta Khristan lenirtemi bilemer.

In Defence of Christians (IDC) telokia, court obendangji Saint Catherine nüchiso aser temeden anema lir, ta metetdaksü. In Defence of Christians telok yagi Middle East nung Khristan tem aser minorities temeden kümzüksü atema inyaker.

IDC-i, court obendang ya ajanga UNESCO World Heritage site aser Khristan tem nüngshi kiojen iladaksür, ta aitsü. IDC executive director Richard Ghazal-i, "Saint Catherine's Monastery nung külemertem aser tenzükertem, iba denji kümei Greek Orthodox kibong den onok nokdaka lir," ta ashi.

"Onoki US sorkar danga Egypt sorkar dang iba court obendang ya tanaben meyipa agitsü atema rongshitsü aser Egypt nung Khristan tem temeden kümzüksü atema inyaksü mepishir," ta paisa metetdaksü.

Tennessee County Jail nung puoka alir nisung 170 baptiogo



Tennessee nung aliba Sumner County Jail nung tepuokdak alir ka baptidang tangokba noksa nung angur.

June 08, 2025: Tang America tesem aika nung tanela asentenshi milak jangrudar; colleges campus tem, tzüyimkü aser outreach sentong balala nung Tsüngrem Tanelai mapa inyaka nisung aikati Khrista nem taküm bendanga agütsür.

Taoba hopta Gallatin, Tennessee nung aliba Sumner County Jail nunga tepuokdak alir nisung 170-i Yisu Khrista agizüka baptiogo.

Yimjak nung Khrista agizükba kulisüa tepuokdak alir tetsür-tebur aika tarensena nokdaker baptiogo.

Osangbener den jembidang Jail administrator, Jerry Scott-i, "Yangi Sumner County jail nung

langka atalokdar. Tepuokdak alir aikati pei taküm Khrista nem bendanga agütsür," ta ashi.

Mapang shia Long Hollow Church aser First Baptist Church, Hendersonville nati jail staff tem den amalitepa inyakba sülen jail nung alirtem tzü nung baptitsür; ajioda taoba hopta nisung 170 baptibaji jail nung khenyongi nisung teimba baptiba liasü.

Kobi melii jail nung alirtem aika pei kümsük abensar pei kidangi meyipa aotsü, ajisüaika jail nungi chiokba sülen parnok taküm melenshir taküm tasen tenzüksü.

First Baptist Hendersonville nungi Chaplain, Bruce Raley-i, "Baptiba anogo ya parnoki

ANOGO ABEN TSÜNGREM DEN

Tenüngsang Agütsüba Osang (T.Ken 73:1-28)

Asaphi Tsüngrem indang pai amangba nung ochi shia nokdak, saka pa ajutok kechiaser pai kiyonger dak tenük yok aser tenük merem. Kechiba tamajunger azükaru ta pai süngmang. Kodang pai tenüng asangba sama, pa metsüdaktsü tenzük aser timatem. Pai meketa alir mereprangi azüklen repranga telangzüba bushitsüba liasü.

Asaphi tamajunger tatembangji metet. Tongtipang tasüngdangbaji "na kong lir?" ta masü saka "na kongi aor?" Nai tesatempa leman kong teraksa lir aji agir asü temesüba leman koba agi taküm dangi anir (t.20) aji agir. Ken züluri Tsüngrem dak reprang aser tengutetba kar angu. Mezüngbuba pa asenok den atentsü nangzükba asoshi asenoki Pa tenüng asangtsüla. Pa tenüng Imanuel, koba tetezü "Tsüngrem asenok den dena lir" (Matt. 1:23).

Tanabuba, asenok Pa teka agi sotta lir. Asenoki Tsüngrem teka ain teyangluba nung angur. Pa teka tanüki asenok tzü tasüngtet anasai aniba asenoki angur. Aser kangki Pa teka angenlokba aser asenok asoshi asüba angur.

Tasembuba, asenok Pa ozüngi aniba asenoki angur. Tsüngremer ozüng aser tenyaba ajak asoshi lir, saka pai asenok kija shia metetta lir. Pai asenok nu menden nung alidang metet aser asenok Pai mulungba ama alitsü. Pai renemtsü. Mapang ka nung anogo ka dang liang aser mapang ka nung mera ka dang merang (A.Shin 4:18). Iba tajungshibaji Tsüngrem O nungi sarasadem nungi arur.

Tatamsa, asenoki Pa kotak sentsüwangshi angutsü. Khristan ama asenoki asenok kotaki aotsü ta metet kechiaser Khristai iba jenjangji kangki nung angutsü (1Tesa. 5:10), Pai nangzük (Yn.14:2,3) aser Pai sarasadem (Yn. 17:24). Asenoki tanü ajakbo mangatettsü, saka tarutsü nung asenok sentsüwangshi lir (1 Peter 1:3,2; 2Peter 1:11; Fil. 4:4).

Khristan ka ama nai tenüngsangtsü aika lir. Tsüngrem ne den lir. Kodang alima ochi mashiba nung na teimla makai kümdir anenang, anüng len reprangang aser Tsüngrem temoatsütem asoshi Pa tenüng sangang.

kodanga mamatoktetsü. Parnoki Khrista sülen anidaksü atema telemtetba agiogo. Parnoki kanga tasü itta kuli süogo," ta metetdaksü.

Tepuokdak alir tetsür kati, "Onoki taküm tasen tenzük aser taküm tajungba alitsü," ta ashi.

Arogotemi ano maneni tepuokdak alir meyirjang aika den Khrista osang lemsateptsü.

God Behind Bars ministry-i 2009 küm nungi tenzüka tepuokdak alirtem taküm melenshidaksütsü atema inyaka arudar.

God Behind Bars nung Innovation Director, Isaac Holt-i, "Onoki jail tem nung satellite campuses amenoker aser onok mission ji tepuokdak alirtem den Khrista osang lemsateptsü atema lir," ta metetdaksü.

Tennessee area nung aliba Faith Promise church-i God Behind Bars den senteper Morgan County Correctional Complex, Bledsoe County Correctional Complex aser Bledsoe County Women's Unit nung inyaka arur.

Campus pastor Lisa Cole-i jail tem nung Khrista osangtajung lemsateper. Lai, "Onoki hopta shia Khrista osangtajung lemstaper. Osangtajung lemsatepba den külemi tekümtet osang lemsateper," ta metetdaksü.

Arogoi lenirtem team balala lemsaer hopta shia jail balalai yoker. Taoba hopta Sumner County jail nung nisung 170 baptiba atema aika pelateper.

Jail nung aika baptiba atema pelaba lemsatepdang Tennessee state representative, William Lamberth-i, "Iba tatalokba atema ni kanga pelar, aser item Khristan tasenpurtem jail nungi chiokdangbo parnoki taküm tasen alitsü atema sarasademtsür," ta metetdaksü.

Paisa, "Kasa tesem nung ni kü taküm Yisu nem agütsüba bilemteter. Kü taküm tajungba atema melenshia liasü. Anungji item nisungtem taküm melenshiba atema ni pelaa bilemer. Atangji taküm melenshitsü aser item kuli rongnung kü taküm kuli-a densema lir," ta ashi.

AO OSHI ANGAZÜKDAK:

TANÜ ANGAZÜKTSÜBA OJANG



Tentinü

(n) benjong anogotem rongnung tuluba, benjongtiba (main day of a festival)

* Moatsü tentinü nashi ak tepseta chiyongteper.

Tentonü

(n)hapta nung tananübuba, amongnü sülenba (Monday)

* Amongnü monger tentonü nisung aikati mapai maor.

OLONG PAITEP # 7176

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- 1. Nisung jenti
- 4. Tsük rudenba
- 6. Temzüng tesashi
- 8. S _ _ _ i
- 9. Nisung telemsa
- 10. Anogoshi
- 12. Ajanga aor
- 13. Tsük rizüngdak
- 14. Tebang nungi adokba
- 16. Süngdong tatembangtiba
- 17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

- 1. Tenük telong
- 2. Committee dang ajar
- 3. Yagi ki okdoker
- 5. Yim lenmang
- 7. Temoatsü keter meyipa aruba
- 11. Kanga junga menemba
- 12. Majinü
- 13. Tzüma nung senzüba

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7174 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12.Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

NAI-A YA METETTER MA



Hollywood superstar Tom Cruise-i Guinness World Record ka nguogo aser iba ya pa indang movie tesüsabuba "Mission: Impossible - The Final Reckoning" nung "most burning parachute jumps by an individual" atema lir.

Iba film ya tan June ita alima ajungalen sayaogo aser Tom Cruise-i helicopter ka nungi parachute enoker pungzüker. Pa ya licensed skydiver ka lir aser iba stunt ya 16 ben agia liasü.

Assam Legislative Assembly tanü special session ka alitsü

Guwahati, June 8, 2025

(Agencies): June 9, 2025 nü Assam Legislative Assembly indang special single-day session ka alitsü.

Iba session ya Assembly Chamber, Dispurnung Hombarnep 9:30 ako nungi tenzüksü ta Assam Legislative Assembly Secretariat-i metetdaksü.

Iba session nung tang rongdak administrative onük kar jembitsü aser state atema tongtipang nisung kar nem tetushi agütsütsü.

Asüng session nung tongtipang onük kaji Dibrugarh Airport tenüng melentsüba asütsü. Dr. Bhupen Hazarika nüngtem nung Airport tenüng melentsü. "Sudhakantha,"

Dr. Hazarika-i Assamese music aser arts nung tongti shilem agiba atema iba tetushi agütsütsü.

Assam state cabinet-i taoba nung iba ya mulunga agizükogo. Assembly züngsemtem longjemmer Dr. Hazarika nem tetushi agütsütsü aser iba nung political

party balala telemsa kecha malitsü ta Observers-i ashir.

Asüng special session nungsa Jal Jeevan Mission indang jembiteptsü. Yimdaklir kilen shia piped drinking water agütsütsüba alizüng atema parnoki olemteptsü.

Iba special session nung Question Hour malitsü saka Zero Hour alitsü aser idanggi Member of the Legislative Assembly (MLA) temi pei pei constituency dak sendakba onüktem lemsateptsü.

CPI-i Assam nung BJP sorkar atsüngdoktsü ayongzüker

Nazira, June 8, 2025

(Agencies): Assam Pradesh Congress Committee (APCC) president Gaurav Gogoi, Rajjor Dal president Akhil Gogoi aser Assam Jatiya Parishad (AJP) president Lurinjyoti Gogoi nungeri Assam nung BJP sorkar atsüngdoktsü atema sentong renemtsüla ta State Communist Party of India (CPI) secretary Kanak Gogoi-i ashi.

Assam nung Left, democratic aser secular party ajak dener economic programme balaka yanglutsüla ta pai ashi.

"State CPI-i Gaurav Gogoi, Akhil Gogoi, aser Lurinjyoti

Gogoi nunger nem alternative economic programme ka yangludaksünür. Left, democratic, aser secular parties ajak dener iba ya inyaksüla, yamaji mesüra Assam nung BJP atsüngdoktsü tasak asütsü" ta Kanak Gogoi-i ashi.

State CPI ya United Opposition Forum, Assam nung teyariteper ka lir aser iba Forum ya 2026 assembly elections nung BJP atsüngdoktsü atema tentetba lir. Ajisüaka, iba Forum nung mepetmesü adoka aruogo.

"Chief Minister Himanta Biswa Sarma-i state nung tang nüngdaktem atema meinyaker.

Pai nübortem rongdak onüktem amadaksünür. State sorkari public taküm aser kiojen kümzüka meyuteter. Iba tangatetba nung Gaurav Gogoi, Akhil Gogoi, aser Lurinjyoti Gogoi nungeri Assam nung Opposition bloc akangshitsüla" ta CPI lennirisa ashi.

"Linük nung tensa tamajung ka ajurua lir. NDA sorkari Indian Constitution aser democracy alema linük madak yimsü asütsü meranger. NDA sorkari India nung plurality, secular structure aser federal system magizüker" ta Kanak Gogoi-isa metetdaksü.

Arambai Tenggol tanishir Kanan Singh Guwahati-i anir ao

Guwahati, June 8, 2025

(Agencies): Central Bureau of Investigation (CBI)-i Imphal, Manipur nung Arambai Tenggol tanishir Kanan Singh apuba sülen Guwahati-i anir ogo.

Osang tejangja kar angazükba sülen June 7 nü pa Imphal Airport nung apu.

Manipur nung küm ana tejakdang kin o kin tsünga rara adokba sülen Supreme Court tetuyuba kübok CBI-i bushisüngdanga arur aser iba nung Kanan Singh puogo.

Manipur nung security tensa mejungi aliba agi iba dak sendakba ken o tem Manipur nungi Guwahati nung belena angadanger.

Arambai Tenggol (AT) tanishir apuba sülen Manipur kübok tesem balala nung mepetmesü adoka lir. District pungu nung nübortemi lungkak aiter aser lenmangtem noktanga

lir.

Iba atema sorkari curfews aser communication blackouts agütsüogo. Imphal West, Imphal East, Thoubal, Bishnupur, aser Kakching nung osang tai prokshiba anendaksütsü atema VSAT aser VPN dena Internet services shibangogo.

District pezü nung Section 144 özüng benokogo aser Bishnupur nungbo tensa majungba agi complete curfew lir.

Deobarnü MLA aser Member of Parliament ka dena züngsem 25 agi akümba telok kati Governor Ajay Bhalla den ajurutepogo.

"Ketdangsürtemi tashishitsü keta inyakba aitsür. Arambai Tenggol nungi özü lanur pungu pua lir saka iba indang osang tejangja kecha mali. Nübortemi ochi metettsüla" ta Congress MLA Okram Surjakumar-i

ashi.

"CBI-i anir bushisüngdangba nung shinga tsütsü tejak mashi inyaker. Kulitem nung ajemdaker Singh apu. Iba operation mapang tanüngba nisungtemji anasa aliba atema apu saka parnok anema ken o kecha melira chioiktsü" ta BJP MLA Kh Ibomcha-ibo metetdaksüogo.

Iba atema Arambai Tenggol-i June 8 nungi tenzüker anogo 10 nü statewide bandh ayongzüker.

June 7 aonung Imphal kübok Kwakeithel aser Uripok tesemtem nung lungkak aitertemi security forces den raratep.

Lungkak aiter karibo pei sasa mi agi rongsettsü merang ta osang angazüker. "Onoki prangpongtem agütsü. Onoki tzümetsüng nung yaritep. Tang nenoki onok apur? Onok asüba tajungba" ta lungkak aitertemi ashi.



Arunachal Pradesh Police-i Tezpur kübok the Garuanpatti area nungi taila Inner Line Permit (ILP) maparen inyakba mapa ka bushiteta Ashis Ghosh apuba sülen agiba noksa angur. Ashis Ghosh ya Deputy Commissioner office, Tezpur nung District Disaster Management Department nung data operator ka ama inyaker aser pai online aser offline ajanga taila ILP yanglu.

Colombia tir asoshi tokteptsü teimla alisang Miguel Uribe dak akha



Bogota, Aami/June 08 (Agencies): Taruba küm tir election nung candidate ka ama tokteptsü südi ta teimla alisang Colombian Senator Miguel Uribe dak linük yimtiba, Bogota nung akhaba sülen mezüngbuba surgery takok ngua agiogo, ta iba yimti mayor ajanga ashi.

Arishi küm 39 tain Uribe ya mezüngbuba surgery ajangetetogo aser kanga tongtipang taneptsü anguba mapang nung lir, ta Mayor Carlos Fernando Galan-i osangbener dang Deobarnü ashi.

Uribe ya 2026 tir election nung tokteptsü asoshi shilem ka ama Honibarnü nübuyim sentong ka nung lia akha. Pa mozüki-i anir aoba sülen pa kinungtsü Maria Claudia Tarazona-i X nung "pa takum asoshi rarar" ta shia liasü.

Uribe ya opposition Democratic Centre party nung züngsem ka lir, koba taoba tir Alvaro Uribe-i tentet. Tena kinungera masü.

Par party-i sangdong ka agütsüba nung ibai agizüktsü makokba azüdokshi lir ta ashi.

Bogota nung aliba Fontibon

kiyong nung public park ka nung nübuyimba sentong nung senator Uribe ya shilem agia lia prangbong bena alirtem arua pa tesülen nungi injang khaloktsü.

Santa Fe Foundation hospital nungi medical report ka ajanga ashiba agi senator ya 'critical condition' nung mozü kidangi anir aru aser "neurosurgical and peripheral vascular procedure" agitsü lir ta ashi.

Attorney General ajanga iba lendong bushisüngdang sutar aser parnoki tekolak nung anaben akha aser dangar ana yiru ta ashi. Iba office nungi sangdong ka agütsüba nung arishi küm 15 tebur ka prangbong bener apu ta ashi.

Sorkaria iba ken o nung osang agütsür nem sempet sen \$730,000 agütsütsü ta shia lir.

Colombia tir office nungia sangdong ka nung sorkari iba ama azüdokshi magizüiker ta ashi aser kanga junga bushisüngdang asütsü ayongzüka liasü.

Leftist Tir Gustavo Petro-ia senator kibong dangi X nung osang ka agütsüba nung, "Nisung takum akumtsübotsüla, iba dak alia kecha mali... Uribe kibong aser Turbay kibong den

ni nokdaka lir. Parnok kangshiba koba taneptsü angutsüar ni memetet," ta shia liasü.

Honibar aonung jembidang Petro-ia iba azüdokshi mapa tamajung inyaksü shibai totuyuba agütsüar aji bushitettsü atema totuyuba agütsüogo ta ashi.

"Tangyabo asenoki bilemba dak alaka kecha mali," ta Petro-i ashi aser security protocols nung tamakok ajuruba reprangtsü ta shisem.

Colombia indang taoba tir Uribe-i, "Parnoki linük teimla, kinungbu tajung, tebu, jabaso, adianu aser külem tenzüker tajung dak amak," ta ashi.

Miguel Uribe ya tang tashibo par party indang official presidential candidate ka ama sangdonga mali, aser par kibong ya Colombia nung kanga jangja meteta lir.

Tebu ya shishilembar aser union lenir ka liasü. Tetsü ya osangbener Diana Turbay liasü aser asür Pablo Escobar lenisüba kübok armed group kati 1990 küm pua bener ao. La ya 1991 küm kimzüksü meranga operation agidang tepset.

Italy nung senso akumtsü ozüing ajemtsü referendum agitar

Rome, Aami/June 08 (Agencies): Senso akumba ozüing tebongpaba akumtsü aser labour tem kumzüka ayuba ozüing tashi itshitsü referendums atema Italy nung vote agütsüba mapang lir.

Iba voting ya Deobarnü tenzüik aser Hombarnü tashi agitsü.

Ballot paper nungya nüburtem dang iba linük nung küm pongu alir Italian senso akumtsü ajung-majung ta asüngdanga lir.

European Union nung dena maliba linük nungi kiyimba mesüra azü tesendaktep makai Italy nung küm ter aliba sülen senso agitsü melar, saka iba maparen inyakdang küm aika agir.

Iba temelenshi aginer temi ashiba agi, iba yagi tang linük nung bendanger million 2.5 shi aliba nung kongshitsü aser Germany aser France densema danga European linük aika den lirumedema Italy indang citizenship law ya akumtsü.

Iba mera ya Italy nung union tongtiba aser left-wing opposition party temi benoka liasü.

Ato Kilonser Giorgia Meloni-i vote agütsüdaki arutsü saka vote bo magütsütsü ta shiogo.

Left temi ibaji democracy anema lir ta aitsür, kechiaser lai yamaji jembiba ajanga iba vote tejangja kumdaktsütsü asoshi temsüa alir vote shilem 51 nüngdakba matongtsü ta ashir.

Meloni'er far-right Brothers of Italy party yagi mejangjaba immigration tem ajemtsü aser migrants atema work visa timba kumdaktsüner aser parnoki iba mera kanga sashia anemer.

Tang aliba system ya kanga tajung lir aser küm aika European linüktem rongnung küm shia senso timtiba agütsüba linükji asenok lir, ta lai Brehostibarnü shia liasü.

2023 küm nisung 213,500 nem Italian senso agütsü, koba EU nung agütsüba pongusü nung shilem ka lir ta statistics

ajanga ashir.

Shilem 90 dak tema EU nungi masü, timba Albania, Morocco, Argentina aser Brazil nungi lir.

Iba temelenshi ya agizük yonga, nisung aikati tim masü ta züngshiba migration law nung mokongshitsü, kong bendanger chir Italy nung asor küm 18 majung tashi senso memeshitettsü shia lir.

Iba ballot nungya labour law indanga shia lir, kong 'better protections against dismissal, higher severance payments, the conversion of fixed-term contracts into permanent ones and liability in cases of workplace accidents' densema lir.

Italy nung iba ama referendums ya 78 ben agi, saka nüburtem shilem agir kanga ajemba ajanga tamakok sa ajurua liasü.

Polling stations ya Deobarnep 7:00 ako nung lapok aser result ya Hombar nikongdang 3:00 ako nung polls shibangba sülen sangdongtsü imlar.

Moscow amaktsü yokba drone 10 khadangogo: Russia

Moscow, Aami/June 8 (Agencies): Russia nunger sepiatemi Moscow amaktsü atema Ukraine-i yokba drone 10 khazüka yokogo, ta yimti mayor Sergei Sobyenin-i ashi.

Kasa mapang nung Ukraine-ia Russia nunger sepaitemi tesem balala amakba mapang nisung ka tepsetba osang metetdaksüogo.

Deobarnü Moscow amakba mapang teraksatsüba adokba osang kecha mali, ajisüaka Ukraine-i kidanger Tula tesem amakba sülen Azot chemical plant nung mi atoka mapang tatsüka arong aser iba mapang nisung ana yirua liasü aser Kaluga tesem nunga drone tenet tashi raksatsüogo, ta regional governor temi ashi.

Russia indang civil aviation authority Rosaviatsia-i Telegram ajanga ashiba agi, anüing nung senzüsenpong nung kecha tetsükdaktsütsü madokdaktsütsü atema Moscow indang Vnukovo aser Domodedovo airport aser iba anasa aliba Kaluga (Grabtsevo) airport nung inyaksangshi anena ata-a liasü. Item airport tem ya mapang tatsüka lir lapoka liasü.

Kyiv-i taoba hopta drone amshia Russia telungi ia tesem balala amakba sülen parnoki Deobarnü Moscow ya maka liasü. Kyiv-i taoba hopta ya Russia indang airbase tem nung nuclear-capable military aircraft tem amaktsü meranga liasü. Iba sülen Moscow-i, telangzüba agüja anogo ishika tsüingda Ukraine amaktsü tenangzüka agüja liasü.

Deobarnü Russia-ia Ukraine kübok tesem balala makogo. Iba mapang Dnipropetrovsk industrial region nung nisung ka tepset, koba drone, artillery aser rocket launcher tem amshia maka liasü, ta regional council tekolakbai ashi.

"Russia nungeri guided aerial bomb kati Synelnykivsky district maka liasü. Nisung ka tepset. Asür kinungertem den asükhu lemsateper," ta Mykola Lukashuk-i ashi.

"Jurila ki pongu aser kindergarten ka raksa liasü," ta paisha shisem.

Dnipropetrovsk kübok Nikopol district nung dokan ka, ki pezü aser power lines tem raksaja liasü, ta paisha shisem.

Deobarnüsa Russia-i ashiba agi, parnok indang ground forces-i küm asem tsüingda tang mezüngbuba Dnipropetrovsk tesem maka iogo.

Russia indang Ministry of Defence-i ashiba agi, tank unit nungi sepaitem Donetsk People's Republic anüolen arrtsü tongogo aser parnoki Dnipropetrovsk tesem maneni makdar," ta Russia-i teyari

agütsüba teloki atsünger aliba tesem tetshia ashi. Iba tesem ya 2014 küm nungi Russia-i teyari agütsüba telok yagi azüoka lir.

Russia-i iba osang lemsatepba dak sendakba nung Ukraine-i tang tashi nung kecha telangzüba agüja mali.

Kremlin-i teyari agütsüba separatists telok aser Russia army den küm ter dak tema raraba mapang Ukraine nunger sepaitem tang tashi nung central region nung khendanga rara danga mali.

Dnipropetrovsk ya Ukraine atema mining aser industrial hub tongtibang ka lir aser Russia nungertemi koda iba tesemi tali atsünga idir yamaji Ukraine military asoshi tetsükdaktsü tulu asütsü, shirnok tang lenla ajak nung timtema arudar.

2022 küm February ita nungi Russia-i Ukraine amak metenzük tsüingda iba tesem nung nütsüingyongsük million asem shi lia liasü.

Ukraine indang military personnel temi taoba mapang AFP news agency dang ashiba agi, Russia-i iba lenden lima nung ya yakta dang tejakdangi aotsü, kechiyong iba tesem nung tenem ongsem amala tetsükdaktsütem mesüra yimtsüing kecha mali, koba Ukraine nunger sepaitemi tejenokdak ama amshitetla.

Maneni Deobarnü ano Russia nunger sepaitemi kidanger Zaporizhia aser Kherson tesem amak aser iba mapang civilian ana yiruja liasü, ta local ketdangsürtemi ashi.

Rara tembangdaktsütsü atema tawa Turkey kübok Istanbul yimti nung sensaksem tejakdangi bener motetba mapang ka nung Russia-i asendenshir Ukraine kübok tesem balala kanga sashia makdar.

Ukraine aser Russia napronglai tepuokertem chioktsü atema mulungtepogo, ajisüaka tepuokertem mechioki menomeyangba atema kati ka aitsütepa arudar. Istanbul nung sensaksemba mapang yimjung atemabo tenangzüktepba meyanglutet, saka tepuokertem melenteptsü nangzüktepa liasü.

Tepuokertem ya iba hopta melenteptsü liasü, aser iba mapang telok anapronglai tepuoker 1000 dak tema chioktsü liasü.

Ajisüaka Moscow-i Honibarnü Kyiv aitsüogo aser ashiba agi, Ukraine-i tepuokertem melenteptsü atema anogo ka melatetteter aser kasa mapang nung Ukraine-i ashiba agi Russia-i tepuokertem melenteptsü atema nangzüktepba ama minyaker.

Taiwan Athletics Open nung India team-i gold medal 6 angu



Indian women's 4x400m relay team

Aami/June 8, 2025

(Agencies): Deobarnü Taiwan Open International Athletics Championship tananübuba aser tatembangbuba anogo India team-i gold medal trok nguogo aser tetsür 800m final aser long jump asaya nungbo medal anana ngua liasü.

National championship asemben tashi koker alisang Vithya Ramraj, Rohit Yadav, Pooja, Krishan Kumar, aser Annu Rani nungeri pei tata asaya nung gold medal ngua liasü.

Yashas Palaksha-i tebur 400m hurdles nung silver medal angu. Pai alizüing 42.22s nung tongtet, koba pa indang personal best time liasü aser 2025 Asian Championships nung masayatetba sülen iba ajanga pasasa dak kanga temulung lemteta kümdaktsütsü.

Tetsür 400m hurdles event nung Vithya-i alizüing 56.53s nung tongteta gold medal angu, koba la asoshi taküm alizüing takaratiba tongtetba tasembuba liasü aser iba ajanga taruba World Championships atema tongtibang points ngutetogo. Tamil Nadu nungi asayar ya 400m hurdles, 400m, and 4x400m relay nunga asaya liasü. Laisa, Federation Cup final nung alizüing 56.04s aser Asian Championship final nung alizüing 56.46s nung tongteter liasü.

Tebur javelin throw asaya nung 75m mark majangtetaka Rohit-i nület meter 74.42 tsüteta pai gold medal nguogo. Taipei nunger asayar Huang Shih-Feng-i silver (74.04m) aser Cheng Chao-Tsun-i (73.95m) bronze medal ngua liasü.

Kasa mapang nung Pooja-i tetsür 800m final nung alizüing

2:02.79 nung tongteta championship record yanglu aser gold medal ngua liasü. Lai külem India tsür Twinkle Chaudhary ajatet, shibai alizüing 2:06.96s nung tongtetogo.

Krishan Kumar-ia tebur 800m final nung gold medal anguba den championship record yanglua liasü. Pai alizüing 1:48.46s nung atong.

Tetsür javelin final nung Annu Rani- nület 56.82m tsüteta gold medal angu. Kasa asaya nung Sri Lanka tsür Hatarabage Lekamalage (56.82m) aser Taipei tsür Pin-Hsun Chu (53.03m) nati silver aser bronze medal ngua liasü.

Tetsür long jump asaya nung India tsür Shaili Singh (6.41m) aser Ancy Sojan (6.39m) nati silver aser bronze medal angu. Iba asaya nung Australia tsür Delta Amidzovski-i 6.49m jukteta gold medal ngua liasü.

Swapnil-i anir India nunger asayartem ISSF World Cup asayatsü

Aami/June 8, 2025

(Agencies): Paris Olympics bronze medallist Swapnil Kusale-i anir India nunger asayartem taküm atema tasembuba ISSF World Cup nung asayatsü, koba Mongolbarnü nungi tenzüka Munich nung asayatsü lir.

Pa shooter Elavenil Valarivan aser nüngtugu international asayartem aika den asayatsü. Domestic asayamungtem nung kanga junga asayaba sülen Kusale tebur 50m rifle 3 positions (3P) event nung asayatsü maongka ngutetogo.

Olympics nung anaben tashi asayar alisang Elavenil Valarivan ya Paris nung asayaba sülen tang mezüngbuba asayatsü lir. Pa taoba mapang Buenos Aires aser Lima nung RPO (Ranking Points Only) shooter ama asaya liasü. Reigning Asian Games champion Palak-a team nung densema tetsür air pistol category nung asayatsü.

Iba World Cup nung asayartem aika WC nung mezüngbuba asayaba angutsü,

kong tetsür air rifle national champion Ananya Naidu-a densema lir. Tebur air pistol asaya nung Aditya Malra aser Nishant Rawat nata tang mezüngbuba India tenüing nungi asayatsü lir.

Olympic aser World champion tem densema linük 78 nungi asayar 695 iba asayamung nung asayatsü. Taküm South America nung WC ana asayatokogo, kong India nunger rifle aser pistol akhartemi medal 15 nguogo. Medal tem rongnung gold trok densema lir. Asayamung ana nung ya India team tanabuba aser tasembuba jenjang nung tembanga liasü.

Ajisüaka Munich leg nung asaya melara masütsü kechiyong asayar tajungtem aikati shilem agitsü lir. 25m rapid-fire pistol (RFP) nung nüngtugu China nunger shooter Li Yuehong, shiba reigning Olympic champion aser Olympics nung medal asem tashi ngua aliba asayar ka lir, pa arishi küm 20 tain reigning Olympic, world, aser Asian champion aser world-

record bena alisang Sheng Lihao den külemi asayatsü.

China shirnoki mezüngbuba leg ana kokogo, parnoki asayar 22 yoktsü, kong tebur air pistol Olympic champion Xie Yu-a densema lir. Hosts Germany-ia asayar 27 yoktsü, kong pistol asaya nung nüngtugu asayar aser taoba mapang Olympic aser world champion Christian Reitz dena lir. Tetsür air rifle qualification world record bena alila Anna Janssen-a team nung züngoksema lir.

Ano RFP legend, Jean Quinquampoix-a France team nung dena lir. Züngsem 19 agi kümtetba Korea team nung reigning women Olympic champions asem rongnung ana; Yang Jiin (25m pistol) aser Oh Yejin (10m air pistol) na dena lir.

USA nunger Sagen Maddalena, Italy nunger Paolo Monna aser Danilo Sollazzo aser Kazakhstan nunger Alexandra Le densema Paris Olympics nung medal angurtem aika iba asayamung nung asayatsü lir.

Neymar dak COVID-19 tashidak potetogo

Aami/June 8, 2025

(Agencies): Brazil nunger forward Neymar dak COVID-19 tashidak potetba sülen pa aninogo, ta pa asayaba club Santos-i metetdaksüba Brazil nung media sangdong balala ajanga metetdaksüogo.

Arishi küm 33 tain asayar dak iba tashidak keta aliba temaitsü Brehostibarnü nungi sayu tenzüker aser iba sülen pa team inyakyimtem nungi anina liasü.

Iba sülen pa medical tetendanga agi aser tashidak keta aliba jangja liasü, ta Brazilian Serie A team yagi Honibarnü sangdong ka ajanga metetdaksü.

Club-i Neymar kobika masayatetsü iba indang osang tejangja magütsü aser Reuters-i telangzüba aginüa mepeshiba magizüki liasü. Neymar dak

tashidak meputet tsüingda pa suspend sütsür aliba ajanga Brehostibarnü Fortaleza den league asaya nung pa masayatsü liasü.

Fortaleza den asayatsü aliba ya Santos atema khen asoshi tatembangbuba asaya asütsü, kechiyong June 14 nü nungi July 13 tashi United States nung Club World Cup asayatsü atema Brazilian league ya khen atema anena atatsü.

Kasa mapang Santos nung taoba mapang Barcelona forward tarutsü ano mejangjai lir, kechiyong pa den tenangzüktepba yanglur aliba June ita tembangtsü.

Pa yiruba ajanga tang asaya aliba season nung Santos nungi tetoktepba ajak nung asaya 12 nung dang asaya aser iba mapang pai goal asem idaktsü aser goal asem assist süja liasü.

Errani aser Paolini nati French Open tetsür tarep asaya akok



Aami/June 8, 2025

(Agencies): Olympic gold medallists Sara Errani aser Jasmine Paolini nati tang mezüngbuba French Open tetsür tarep asaya kokogo.

Second-seeded Italy nunger tarep aser taoba küm Roland-Garros runners-up yagi Deobarnü final asaya nung Anna Danilina aser Aleksandra Krunic na 6-4, 2-6, 6-1 agi koka liasü.

Iba asaya akokba ya Errani atema French Open tarep asaya tanabuba aser Grand Slam trokbuba akokba liasü. Arishi küm 38 tain asayar ya taoba mapang Roberta Vinci den kanga takok ngua asayaogo aser tenati U.S. Open, Wimbledon aser Australian Open nunga takok nguogo.

"Iba ya tennis asaya lir aser onok kodanga manener. Anogo shia rangloker asayatsü meranger aser noklang nung noklangbo jangradema masayai alitsü akok, kechiyong nai anener aji bilema mekazüteter. Ajisüaka tangbo onoki kechi ajangzükteter ya kanga tulu ta angatetsü merangdar. Grand Slam ka akokbaji alima nung ajak dang tajungtiba lir," ta Errani-i ashi.

Errani aser Vinci nati 2012

küm Roland Garros nung takok anguba sülen Italy tsürtem rognung kati danga French Open tetsür tarep asaya mekoki liasü.

Errani-i taküm Paris nung title ana benogo. Lai Andrea Vavassori den külemi tarep temeyoktep asaya dena kokogo.

Kasa mapang nung Paolini ya kija asayar tajung ka lir aser la taoba küm French Open nung runner-up liasü. Final nung lai Iga Swiatek makok.

"Nai ni kanga ajungmesor," ta Paolini-i Errani dang ashi. "Na kü team nung aliba ya jangrademtsüka aser iba amala takok nü den lemsatepba ya kanga tajung lir. Kü atemabo na ya legend ka."

Kasa asayamung nung Honibarnü tetsür kija asaya final nung Coco Gauff-i set ka mekoki aliba nungi meyipa tur world number one asayar Aryna Sabalenka kokogo.

Tanabuba jenjang nung aliba America tsürta yagi final asaya ya 6-7 (5/7), 6-2, 6-4 agi koka lai tang agi Grand Slam tanabuba kokogo. 2023 küm US Open final nunga lai Sabalenka koka liasü. Gauff-i iba asaya ya ghonda ana ser minute 38 nung koka liasü.

BILEMDANGANG

"Amajok watidak mapang tintok."